

VENDIM
Nr. 190, datë 30.3.2022

**PËR MIRATIMIN E RREGULLAVE PËR SHPËRNDARJEN E KOSTOVE TË
LIDHURA ME KOORDINIMIN E PUNIMEVE CIVILE**

Në mbështetje të nenit 100 të Kushtetutës dhe të pikës 7, të nenit 15, të ligjit nr. 120/2016, “Për zhvillimin e rrjeteve të komunikimeve elektronike të shpejtësisë së lartë dhe sigurimin e së drejtës së kalimit”, me propozimin e ministrit të Infrastrukturës dhe Energjisë, Këshilli i Ministrave

VENDOSI:

1. Miratimin e rregullave për shpërndarjen e kostove të lidhura me koordinimin e punimeve civile, sipas tekstit bashkëlidhur këtij vendimi.

2. Ngarkohen autoritetet përgjegjëse për zgjidhjen e mosmarrëveshjeve, sipas përcaktimeve në nenin 7, të ligjit nr. 120/2016, “Për zhvillimin e rrjeteve të komunikimeve elektronike të shpejtësisë së lartë dhe sigurimin e së drejtës së kalimit”, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR
Arben Ahmetaj

RREGULLA
**PËR SHPËRNDARJEN E KOSTOVE TË LIDHURA ME KOORDINIMIN E
PUNIMEVE CIVILE**

Neni 1
Objekti

Ky dokument ka si objekt përcaktimin e rregullave për shpërndarjen e kostove të lidhura me koordinimin e punimeve civile.

Neni 2
Qëllimi

Qëllimi i këtyre rregullave është lehtësimi i kostove për ndërtimin e rrjeteve të shpejtësisë së lartë të komunikimeve elektronike përmes koordinimit të punëve civile.

Neni 3
Parime të koordinimit të punimeve civile

1. Koordinimi i punimeve civile në ndërtimin e rrjeteve të shpejtësisë së lartë të komunikimeve elektronike bazohet në parimet e transparencës, proporcionalitetit dhe orientimit në kosto.

2. Koordinimi i punimeve civile për ndërtimin e rrjeteve të shpejtësisë së lartë të komunikimeve elektronike bëhet mbi bazën e kërkesës së palës së interesuar dhe pranohet në rastet e parashikuara në ligj.

Neni 4
Përkufizime

Termat e përdorur në këtë dokument kanë të njëjtin kuptim me përkufizimet e dhëna në ligjin nr. 120/2016, “Për zhvillimin e rrjeteve të komunikimeve elektronike të shpejtësisë së lartë dhe sigurimin e së drejtës së kalimit”.

Neni 5

Shpërndarja e kostove të lidhura me koordinimin e punimeve civile

1. Në rastin e pjesëmarrjes së më shumë se një operatori rrjeti në punimet civile për ndërtimin e rrjetit/eve të komunikimeve elektronike të shpejtësisë së lartë, kostot për punimet civile ndahen në mënyrë përpjesëtimore midis pjesëmarrësve.

2. Në rastin kur punimet civile për ndërtimin e rrjetit të komunikimeve elektronike të shpejtësisë së lartë kanë filluar nga një operator i rrjetit të infrastrukturave, me paraqitjen e kërkesës dhe pranimin e saj sipas parashikimeve në ligj për koordinimin e punimeve civile, të gjitha kostot/shpenzimet respektive për kryerjen e punimeve civile për shtrimin e rrjetit/eve respektive ndahen midis operatorëve pjesëmarrës sipas formulës:

$$K_i = \text{Kosto totale} * P_i / n$$

“ K_i ” është kostoja që do të paguajë secili operator.

$$\text{Kostoja Totale} = k_1 + k_2 + \dots + k_j$$

Me “ k_j ” janë shënuar elementet e kostove të punimeve civile (gërmim dheu, zhvendosje të dheut, kthim në gjendjen e mëparshme, kosto për elementet e mirëmbajtjes/puseta etj.).

Me “ n ” është shënuar numri total i operatorëve pjesëmarrës në koordinimin e punimeve civile.

P_i – Pesha specifike për secilin pjesëmarrës

3. Pesha specifike përcaktohet mbi bazën e përqindjes në volum të punimeve të secilit sipas natyrës, llojit dhe sasisë së elementeve që kërkon ndërtimi dhe mirëmbajtja e rrjetit përkatës të infrastrukturës.

Neni 6

Zgjidhja e mosmarrëveshjeve

Në rast të mosmarrëveshjeve për koordinimin e punimeve civile, pala e interesuar i drejtohet autoritetit përgjegjës për zgjidhjen e mosmarrëveshjeve sipas përcaktimeve në nenin 7, të ligjit nr. 120/2016, “Për zhvillimin e rrjeteve të komunikimeve elektronike të shpejtësisë së lartë dhe sigurimin e së drejtës së kalimit”.